

Pandemik COVID-19 rahmat kepada perpaduan negara

KUALA LUMPUR: Situasi pandemik COVID-19 yang melanda dunia ketika ini dilihat sebagai satu rahmat yang membantu memantapkan lagi konsep perpaduan dalam kalangan masyarakat berbilang kaum di negara ini.

Penasihat Sekretariat Rukun Negara Universiti Putra Malaysia (UPM) Prof Sarjit Singh Gill berkata berbanding sebelum berkunya pandemik itu, masyarakat kini mulai sedar mereka perlu hidup bersama, saling membantu dan menghormati antara satu sama lain.

“Sebelum COVID-19, kita lihat banyak perdebatan, konflik, dan juga persaingan, memang ada juga kerjasama tapi agak terbatas. Tetapi semasa COVID-19, kita melihat kerjasama sesama masyarakat semakin tinggi, konflik seolah-olah sudah tiada, konflik dalam masyarakat melibatkan perkauman sudah tidak kelihatan sekarang.

“Inikah masanya Kementerian Perpaduan Negara melihat dalam konteks bagaimana rakyat mengangkat perpaduan ini. Saya rasa ini adalah satu landskap perubahan yang berlaku dan di sini saya lihat kekuatan masyarakat seperti pertubuhan bukan kerajaan, pertubuhan agama dan belia mula menggunakan gerakan mereka untuk membantu masyarakat semasa krisis ini berlaku,” katanya.

Beliau berkata demikian dalam program Ruang Bicara di Bernama TV bertajuk '#KitaJagaKita - Mengurus Perpaduan Negara' di sini malam kelmarin. Turut menjadi tetamu adalah Anuar Ahmad, pensyarah kanan di

Pusat Pengajian Pendidikan dan Kesejahteraan Komuniti Fakulti Pendidikan Universiti Kehangsaan Malaysia (UKM) serta Presiden Majlis Belia Malaysia Jufitri Joha.

Sementara itu, Anuar berkata sistem pendidikan dalam negara perlu dikaji semula seiring dengan cara masyarakat berfikir dan bertindak pada era ini, contohnya, seperti menekankan konsep bernegara.

Katanya sekiranya perkara seperti Rukun Negara, perpaduan dan meraikan kepelbagaiannya dikecualikan, Malaysia mungkin hanya melahirkan ramai profesional yang tiada penghayatan kepada soal bernegara sekali gus membawa keburukan kepada negara.

“Tetapi alhamdulillah, ketika COVID-19 ini kita lihat semua petugas barisan hadapan dari semua kaum berganding bahu dan bekerja kuat. Tetapi kita kena tingkatkan kualiti itu, supaya pada masa depan rakyat kita akan jadi lebih menghayati konsep kenegaraan,” jelasnya.

Dalam pada itu, Jufitri berkata media sosial, jika tidak diurus dengan baik, boleh menjadi antara penghalang kepada semangat patriotisme dalam kalangan generasi muda.

“Media sosial banyak berita palsu, isu... yang (boleh beri kesan negatif) kalau kita tidak mendidik generasi muda untuk menapis, berfikir kritis dan paling penting membezakan mana berita benar dan berita palsu.

Jadi harus didik generasi muda bagaimana untuk menggunakan platform itu dengan sebaiknya,” katanya.

— Bernama